

# Spargnar dapli – ni gudignar dapli?

La suprastanza communal dad Ilanz/Glion lai examinar las pusseivladads

DAD AUGUSTIN BEELI / ANR

■ **Mesjamna ei il parlament communal dad Ilanz/Glion s'occupava da treis incumbensas ch'el ha surdau alla vischnaunca. Ei va per ina evaluaziun dils process, dall'organisaziun e dallas pusseivladads da spargnar cuosts. Ina mesira leutier ha la suprastanza gia instradada. Ella ha alzau las tariffas dallas taxas d'aua.** L'incumbensa da *Mirko Duff* han 15 dils 24 parlamentaris suttascret. Quella vul che la suprastanza elaboreschi in rapport davart las experienschas fatgas cull'organisaziun e cul model da menar la vischnaunca. Lu han dus ulteriurs parlamentaris dad Ilanz/Glion inoltrau incumbensas. *Carmelia Maissen* giavischa che la suprastanza presentia propostas co la vischnaunca sappi spargnar e tgei pusseivladads ch'ei detti da restructurar organisaziun e process da lavur. Impurtont seigi ch'els cuosts creschian buca vinavon. Quell'incumbensa han 20 dils 24 parlamentaris suttascret ils 30 da november 2016.

## Treis damondas – ina finamira

Lu aunc la tiarza incumbensa, quella che *Lorenz Alig* ha inoltrau il medem gi. El e 19 collegas giavischan ina evaluaziun el sector dalla scola. La suprastanza dueigi eruir e numnar ils factors che fetschian explodir ils cuosts. Tuttas treis incumbensas ha il parlament surdau alla suprastanza communal e pretendiu rispuestas. Ils 30 da november 2016 aveva il parlament giu da tractar il preventiv 2017. La suprastanza, la direziun operativa e la cumissiu da quen e gestiun havevan proponiu d'alzar il pei da taglia per diesch pertschien. Suenter ina viva e liunga discussiun aveva il parlament denton buca fidau als gremis directivs da Glion, ina maioritad ha refusau la proposta.

Tenor la suprastanza communal ha vess igl alzament dil pei da taglia gidau da



Mesjamna ein ils parlamentaris s'entupai per la 30avla gada en Casa Cumin a Glion. La foto muossa il parlament dad Ilanz/Glion a caschun dalla viseta a Berna la fin da november 2014.

FOTO A. BEELI

dumignar a liunga vesta il problem finanziel dalla vischnaunca Ilanz/Glion. Enstagl da dar suatientscha a quella proposta aveva il parlament surdau alla suprastanza communal las treis incumbensas menziunadas. Mesjamna sera, a caschun dall'empresca sesida dil 2017, ha il parlament tractau la rispuesta. Da principi havess la suprastanza communal duiu dar treis rispuestas separadas sin treis incumbensas inoltradas. Per motivs pragmatics e damai che tuttas treis incumbensas mondien ella medema direziun seigien ins selubius dad unir quellas treis rispuestas, ha la suprastanza argumentau. Ella discussiun d'entrada silla

tractanda ein singuls parlamentaris buca stai d'accord cun quei agir. La discussiun ei stada giavischada, ella ha denton menau era ella direziun che la suprastanza giavischava. La finala ha il parlament votau unanim per la proposta dalla suprastanza.

## Analisar la situaziun – tochen igl atun

Persula sappi ella buca far ina analisa da cuosts, organisaziun dalla vischnaunca e process da lavur. El senn da tuttas treis incumbensas seigi ei indispensabel ch'in post extern accumpogni ina tala procedura. Evidentamein ei quella buca gratuita. Il parlament ha autorisau la supra-

stanza communal da schar far l'evaluaziun externa. Il Center da management administrativ dalla Scol'aula da tecnica ed economia a Cuera ha fatg leutier ina offerta. Suenter ch'il parlament communal ha ussa decidiu en causa sa la suprastanza lantschar l'analisa. Els cuosts ein plafonai sin 40 000 francs.

*Dominik Just* ei meinaproject ed *Ursin Fetz*, il directur dil center, accumpogna igl entir process. L'analisa en sis pass entschiva igl avrel cun in workshop. Sche la suprastanza communal vul integrar en quel ils iniziants dallas incumbensas sa ella decider sezza. Tier las finamiras dall'evaluaziun s'audi da dar ina survesta

dil contonschiu dapi la fusiun, da musar co tuts involvai lavuran ella vischnaunca Ilanz/Glion, proponer alternativas, rasar ora las finanzas e presentar pusseivladads da spargnar cuosts. Ina analisa dalla scola e sia influenza sillas finanzas duei vegnir fatga cun in project separau.

## Mesiras da spargn fan effect el 2016

Il parlament communal ha priu notizia d'ina mesira rigurusa che la suprastanza pren per metter egl equiliber in post da cuosts. Ella ha instradada ina midada dallas leschas da provediment d'aua e quella dalla canalisaziun. Il president communal *Aurelio Casanova* ed il geru *Roman Cantieni* han presentau la situaziun. Tenor lescha ston las taxas d'aua e canalisaziun curclar ils cuosts els dus secturs. Els menaschis seigien denton mintg'onn ault deficitar, ha il president communal getg, en vesta allas investiziuns ch'ins stoppi far ils proxims onns seigi da prender mesiras. Schar las taxas sillas tariffas che valevien dapi la fusiun seigi buca da responsar pli gitg, ha Casanova dau d'entellir al parlament. La taxa sin quantitad ha la suprastanza perquei alzau sigl 1. da schaner 2017 da 50 sin 80 raps il m<sup>3</sup>.

Finamira seigi da generar entradas dad in milliun francs tiel provediment d'aua ed 1,3 milliuns tier la canalisaziun. Cun quella mesira sappien ins metter ella dretga ballonscha entradas ed expensas en quels dus secturs dall'infrastructura communal. Parallel cun quell'informaziun digl augment da taxas ha il president communal denton era saviu comunicar ina novitad encuraschonta. Il quen 2016 dalla vischnaunca seigi fete legreviels e siari cun in bia meglier resultat che spitgau. Il budget 2016 dalla vischnaunca Ilanz/Glion aveva quintau cun in deficit da 540 000 francs. Las mesiras da spargnar fan, sco quei ch'ei para, gia effect.

# Aua dalla spina enstagl dalla butteglia

L'uniun «Gotthard-Connects» vul sensibilisar la gliued per l'impurtonza dall'aua

DA HANS HUONDER / ANR

■ **L'entschatta digl onn ha l'uniun «Gotthard-Connects» lantschau in project che vul sensibilisar la gliued per l'impurtonza dall'aua. «Quellwasser.ch» duei denton era far attents sin l'impurtonza dalla Svizra sco combra d'aua dall'Europa.** «En Svizra consume-scha mintga persuna annualmein rondund 120 liters aua butteglia. Per part deriva quell'aua schizun d'autras tiaras», di *Marja Nieuwveld*. Per la presidenta dall'uniun «Gotthard-Connects» ei quei in fatg che fa surstar: «En special ei quei remarcabel ord vesta dall'aua che stat a nus a disposiziun e che sa vegnir retratga sco eccellente aua da beiber di per di dalla spina.» Sco quei che Nieuwveld constatescha ei l'aua da spina 1000 ga megliera che aua ord butteglia da pet. Leutier ei l'aua dalla spina bia pli favoreivla. «Plinavon ston ins saver ch'ei drova treis gadas dapli aua entochen ch'ina butteglia da pet ei emplenida. Leutier vegnan ils numerus kilometers dil transport.»

## Pliras finamiras

L'uniun «Gotthard-Connects» ha pliras finamiras. Davart ils projects vegnents vul la presidenta denton buca dir la massa. Suttamein pertuccont in: «La stad ei previu ina gronda campagna sin la lingia dil Rein dalla tgina entochen Rotterdam. Il Rein ei miu favorit personal, era per quei ch'el meina mei en miu liug da naschientscha Rotterdam.» La campagna ei dedicata alla regiun dil Gottard ch'ei reha d'aua:



Marja Nieuwveld ha saviu declarar dacuort a cusseglier guvernativ Ueli Maurer las finamiras dall'uniun «Gotthard-Connects».

MAD

«Nus lein far attenta la gliued sin quei grond scazi.» El center dall'activitad dall'uniun ei il mument il project «Quellwasser». «La Svizra ei la combra d'aua dall'Europa e l'aua da fontauna da cheu deriva ord il cor dil mund», di Nieuwveld. Per promover la schientscha da nezegiar l'aua che nescha ella regiun ha l'uniun

scaffiu ina caraffa. «Nus havein gia vendiu pli che 200 tocs da quella butteglia da glas. Aschia ha in'interpresa dalla Val dil Rein songagliosa retratg 130 tocs sco regal alla clientella. Retratg quella han denton era persunas singulas ni hotels. Nus essan fetg cuntents cun la partenza da quella purschida», relata la presidenta dall'uniun. La

caraffa duei vegnir nezegiada per l'aua che sa vegnir retratga dalla spina en mintga casada: «Nus lein promover il patrig dalla persistenza. Dameins kilometers e rumien, mo era pli pauc s'fartem d'aua.» Ina part dil recav va en favur da projects per la protecciun dallas fontaunas. «La campagna ha la finamira da regurdar a

nossa combra d'aua per l'Europa e che nus havein la megliera aua. Nossa aua ei la megliera per l'entira regiun e pli sanadeivla che aua butteglia.»

## Commembers novs ein beinvegni

L'uniun «Gotthard-Connects» dumbra il mument 20 commembras e commembers ell'entira Svizra. Nieuwveld spera da saver beneventar bein spert ulteriurs. Parallelmein vegn l'uniun sustenida d'in comite da patronadi. En quel ein denter auter igl ambassadur dall'aua *Ernst Bromis* ed igl investur *Samih Sawiris*. Dacuort ha Nieuwveld era saviu perschader cusseglier federal *Ueli Maurer* dil project. El ha retschiert la presidenta dall'uniun a Berna per laschar orientar davart la campagna. «Nus havein aunc differentas finamiras e per quei motiv essan nus leds e cuntents da mintga persuna ch'ei pronta da collaborar en ina fuorma ni l'autra. Communablaein eis ei pusseivel da derasar la capientscha per la combra d'aua dall'Europa sin quest mund. Quell'aua da fontauna dalla megliera qualitat mereta l'attenziun cumpleina sco era in plaz ferm sin la meisa da magliar e schizun sil pult en biro.» La caraffa scaffida per quei intent porta il slogan «Quellwasser». Marja Nieuwveld enonuscha la regiun d'Andermatt e dil Gottard dapi sia affonza: «Cheu passentavan nus adina ina part da nossas vacanzas. Culs onns ei quella regiun carschida a cor a mi.» Avon sis onns ha ella allura decidiu da prender dimora ad Andermatt.